

Oqartussaaqataaneq akisussaaqataanerlu

Kommunimut qinersineq 2025

Innuttaasut qinersisartullu tamassi kommuninut qinersinissaq nallerpoq. Ataatsimut oqartussaaqatigiilluta siunissatta isummerfiginissaanut qilanaarlunga maanna Inuit Ataqtigiiit ukiuni tulliuttuni sisamani kommunini anguniarumasaat saqqummiuppagut.

Ikinngutinnersumik

Múte Bourup Egede, Siulittaasoq

Inuit Ataqtigiiit innuttaasut oqartussaaqataanerat qitiutillugu sulissaagut. Najugaqartut nunartik qanoq ineriartortikkusunnerlugu ilisimavaat, inoqarfinni tamani innuttaasunit aallaavilimmik siuarsaanissamik siunertaqarluta sulissaagut. Najugaqartut ilisimasaannik atorluaassaagut akuutitsissallutalu.

Inoqarfinni aningaasarsiorneq siuarsarumallugu nukiit ataatsimoortinneqarnissaat Inuit Ataqtigiiit sulissutigissavaat.

Oqartussaaqataaneq akisussaaqataanerlu

Inuuffigisami oqartussaaqataaneq inuiaqatigiinnut akisussaaqataanermik malitseqarpoq.

Kommunit aaqqissuuteqqinneqarnerisa siunertaa pitsaasuusimagaluartoq oqartussaaqataassuttip ungasinnerulerneratut misigineqarnera Inuit Ataqtigiiit paasilluarparput.

Inuuffigisap ineriartortinnissaanut piffimmi najugaqartut oqartussaassuseqarfigalugulu akisussaaffigissavaat, ineriartorneq najugaqartut pilersitseqataaffigissavaat. Kommunini aaqqissuussinerput oqartussaaqataassutsimik pilersitsinerusoq pisariaqartipparput.

Inuit Ataqtigiiit Inatsisartuni issiatitaqarnermigut kommunini oqartussaaqataassuttip qulakkeernissaanut suleqataanissatsinnut piareersimavugut.

Illoqarfiit mikinerusut nunaqarfiillu oqartussaaqataatillugit ineriartussaagut

Inuit Ataqtigiiit kommunalbestyrelsemi sulinitinni illoqarfinni mikinerusuni nunaqarfinnilu ineriartorneq najugaqartut peqatigalugit ineriartortsinissamat pilersaarusiortutik sulissaaagut.

Nunaqarfinni Aqutsisut aalajangiisinnaassuseqarlutik qinikkatullu sulinerminni kommunalbestyrelsemit qaninnerusumik suleqatigineqartariaqarput.

Inuit Ataqtigiiit illoqarfinni mikinerusuni nunaqarfinnilu ineriartorneq angujumallugu kommunini tamani illoqarfinnut mikinerusunut nunaqarfinnilu ineriartortitsinissaq siunertaralugu ataatsimiititaliamik pilersitsissapput. Ataatsimiititaliaq illoqarfinni mikinerusuni qinikkanik aammalu nunaqarfinni aqutsisunik qanimut suleqateqassaaq ukiunilu aggersuni ineriartortitsinikkut anguniakkanik suliaqassapput.

Innuttaasunik sullissineq

Innuttaasut isumaginninnikkut sullinneqarnerat qaffasissuussaaq. Innuttaasut inatsisit malillugit sullinneqarnissaat pingaaruteqarpoq. Inuk sullinneqartoq nalorninaatsumik sullinneqarnissaa tamatigut salliussaaq.

Inunnik isumaginninnermi suleriutsini nutarterinissaq pisariaqartipparput, sullissisunut aammalu saaffiginnittunut paasinartunik. Inunnik sullissinnermi kommunit kivitsisinnaanerat qaffassarneqassaaq Naalakkersuisut inatsisiliortullu peqatigalugit, inunnik sullisinnermut inatsisit sinaakkutaasut nuna tamakkerlungu aqqissuunneqassapput.

Inatsisiliornermi kommunit akuutinneqassapput

Inatsisartut inatsisiliaat kommunit atuutittarpaat. Inatsisiliornermi kommunit ulluinnarni sulisoqarnikkut aningaasaqarnikkullu kivissinnaasaat naapertorlugit inatsisiliat suliarineqarnissaat Inuit Ataqtigii pingaartippaat.

Kommunit innuttaasunik qanimut sullissisuupput taamaammallu pingaaruteqarpoq inatsisinik malinninnermi kommunit sulisoqarnikkut atugassaasa pitsaasumik inissisimanissaat. Inatsisiliornermi kommunit tusarniaavittut inissinnagit peqatigalugit inatsisilioriaaseq nutartigaq suliarineqassaaq.

Aningaasaqarnikkut akisussaassusilimmik attanneqarsinnaasumillu ineriartornermut toqqammaveqartumik aqutsineq

Aningaasaqarneq pitsaasoq kommunip ingerlalluartup toqqammavigaa. Kommunit aningaasaatiminnik akileraarutitigut akitsuutitigullu akilikkanik aqutsisuunerat Inuit Ataqtigii ilisimaarilluarpaat. Sulinnermi aningaasat atorneqannginneranni akisussaassusilimmik peqqissaartumillu iliuuseqartarneq toqqammavissaaq. Suliniutit nutaanik insertitaqarnissamik periarfissiisut Inuit Ataqtigii tappiffigissavaat. Tamakku tassaasinnaapput umiarsualivinnik ineriartortitsinerit, suliniutit takornarianik ornigukkusulersitsisut il.il.

Kommunini aningaasarsiorneq qaffassartuarneqartariaqarpoq, innuttaasut nalunngilaat qanoq nunartik inuussutissarsiutitigut siuariartortissallugu. Sulissutigissavarput inuussutissarsiornermi siuarsaanermit qitiusumik tapiissutit kommuninut annerusumik iluaqutaalersissallugit.

Mittarfissuit nutaat atuutilerit kommunin aningaasaqarnerannut inuussutissarsiutigullu ineriartortitsinnermut iluaqutaassapput. Nunap immikkoortuini avammut toqqaannartumik mittarfiit aqqutigalugit niueruteqarsinnaanerit inuussutissarsiutigullu ineriartortitsisinnaanerit aqqutissiuutissavagut.

Kommunit ataatsimoorussaqlutik angunigaqtiginnerat

Nunatsinni oqartussaaqataanermit kommunit assigiinngikkaluarluarlutik misilittakkaminnik aammalu suliaminnik anguniagaqtigiissinnaanerit periarfissaqassaaq.

Inuit Ataqtigii isumaqarput kommunit suleqatiginnerat sulii annertunerusariaqartoq.

Kommunit akunnerminni allaffissornikkut suleqatigiinnerat ingerlasarpoq, qinikkalli suleqatigiinnerusinnaanerat Inuit Ataqtigiit kissaatigaat. Qiniikkanut oqalliseqatigiittarfimmik piffimmi pissutsinik, namminersorlutik oqartussat suliniutaannik oqalliffiusinnaasumik, pisariaqarfiatigullu ataatsimoorluni siunnerfilinnik isorinnissutininik saqqummiussiveqarsinnaanera suliarissavarput.

Takornariaqarnikkut ineriartorneq

Kommunit suleqatigiillutik takornariaqarnerup ineriartorteqqinneranut suleqatigiissapput. Maannamut annerusumik takornariaqarnek kommunit akunnerminni suleqatigiissutigissavaat.

Takornarissat tikittussat sapinngisamik inoqarfinnut siammarlutik takornariarsinnaangortinneqassapput taamaasilluni takornariaqarnek kommuninut tamanut iluaqutaanerulersillugu.

Kommunini inuussutissarsiornermut tapiissutit takornarialerinermit pisariaqartitat naapertorlugit tulluussarneqarnissaat sulissutigissavarput. Kommunini inuussutissarsiutitigut ineriartortitsilluni suliniutit kommunit akornanni suleqatigiissutigineqassapput, nunatsinni aningaasarsiornikkut kommunit suleqatigiinnermikkut kivitseqataassasut Inuit Ataqtigiit isumaqarput.

Inuit Ataqtigiinnut pingaaruteqarpoq najukkami inuussutissarsiornek najugaqartut ineriartortissagaat tamaaattumillu suliffeqarfiit pisortanit pigineqartut najugaqartut ineriartortitaannut unammillinnginnissaat sulissutigineqassaaq.

Avatangiisit minguitsut

Inoqarfinni minguitsumik avatangiiseqarnek inoqarfiup ineriartortinnissaanut iluaqutaavoq.

Nunatta pisuussutai uumassusillit inuussutissarsiutitta aalisarnerup qiterai. Pinngortitarsuaq alianaaqisoq takornariartitsinermit inuussutissarsiortut isertitsiffigilluarsinnaavaat.

Inuit Ataqtigiit inoqarfiit eqqiluitsuunissaat, minguitsumik imeqarnek, nutaaliaasunik kuuffissuaqarnek, kiisalu nutaaliaasunik avatangiisinullu innarliinngitsumik eqqakkanik passussisarnek kommunalbestyrelsini ilungersuutigalugu nangittumik anguniassavaat.

Kommunalbestyrelsemi pinngortitamik mianerinnittumik nungusaataanngitsumik toqqammaveqarnek sulissutigissarput.

Erngup nukiliorfiusinnaasunik atuilluarnek, seqernup nukiganik kiisalu nukissioriaatsit allat avatangiisinut innarliinngitsut inerisarnekassapput, taamaaliornikkut suliniutit atasinnaassusillit aallartinneqarsinnaaqullugit.

Najukkani ineriartornermi imeqarfiit killingititaat illoqarfiit ineriartornissaannut killiliisut immikkut ittumik suliniarfigissavagut.

Inoqarfinni najugaqartut ineriartornermik oqartussaaqataanermillu periarfississagavagut. Anguniakkatsinnik ikiortigut, qinigassanngortitattalu ilaannik qinersilluarisi.